

## SPORAZUM

### o smještaju socijalno ugroženih osoba žrtava nasilja u porodici u "Sklonište za zlostavljane žene i djecu"

Zaključen dana .2021. godine u Sarajevu između:

1. *Ministarstva za rad, socijalnu politiku, raseljena lica i izbjeglice Kantona Sarajevo, ulica Reisa DŽ. Čauševića broj 1. (u daljem tekstu: Ministarstvo), zastupano po ministrici Ivani Prvulović,*
2. *Fondacije lokalne demokratije, ulica Bravadžiluk bb, Sarajevo, zastupane po direktorici Jasmini Mujezinović*
- i*
3. *Javne ustanove "Kantonalni centar za socijalni rad", ulica Gatačka broj 80. (u daljem tekstu: Kantonalni centar), zastupane po direktoru Mahiru Deliću*

**U želji da** zajedničkim naporom i iskrenim namjerama doprinesu zaštiti osoba izloženih nasilju u porodici;

**Cijeneći da** je neophodno uspostaviti i nastaviti partnerske odnose i saradnju;

**Uzimajući za osnov** sve naprijed navedeno, strane potpisnice su se sporazumjele o cilju, oblasti i obliku saradnje na način kako slijedi:

#### Član 1.

(1) Fondacija lokalne demokratije će po utvrđenim kriterijima primati na smještaj u sklonište zlostavljane žene i djecu po zahtjevu i odluci Kantonalnog centra, do popune raspoloživih kapaciteta.

(2) Izuzetno po zahtjevu Ministarstvu unutrašnjih poslova Kantona Sarajevo (u daljem tekstu: MUP), u sklonište će se primiti zlostavljane žene i djeca bez zahtjeva i odluke Kantonalnog centra ako to situacija nalaže. MUP i Fondacija lokalne demokratije su dužni prijaviti, hitno, a najduže u roku od 12 sati od momenta prijema, smještaj Kantonalnom centru, kako bi slučaj bio registrovan i kako bi se mogle poduzeti potrebne radnje na njegovom rješavanju.

#### Član 2.

Kriterije za prijem zlostavljanih žena i djece definiše stručni tim Fondacije lokalne demokratije, koji čine: psiholog, psihijatar, socijalni radnik i menadžer projekta i stručni tim Kantonalnog centra.

### **Član 3.**

Fondacija lokalne demokratije se obavezuje da će zlostavljanim ženama i djeci obezbijediti u skloništu:

- a) uslovan smještaj,
- b) stručnu pomoć psihologa, psihijatra, socijalnog radnika, ljekara i drugih stručnjaka po potrebi,
- c) sigurno sklonište do konačnog rješenja njihovog problema,
- d) kao i druge uvjete u skladu sa potrebama zlostavljanih žena i djece.

### **Član 4.**

(1) U pogledu zaštite interesa zlostavljanih žena i djece Fondacija lokalne demokratije će usko saradivati i poštovati odluke Kantonalnog centra.

(2) Na prijedlog i odobrenje Kantonalnog centra angažovat će se na ostvarivanju određenih prava žena i djece ukoliko za to postoji potreba.

### **Član 5.**

Fondacija lokalne demokratije će dostavljati Izvještaj o svim važnijim pitanjima ili promjenama u pogledu života i zdravlja zlostavljanih žena i djece smještenih u sklonište tromjesečno, a po potrebi, na zahtjev Kantonalnog centra ili Ministarstva i češće.

### **Član 6.**

(1) Fondacija lokalne demokratije će spriječiti bilo kakav kontakt zlostavljanih žena i djece sa osobama sa čije su strane zlostavljeni.

(2) Princip profesionalne tajne u radu skloništa će biti osnovni princip ponašanja svih zaposlenih.

(3) Sporazumne strane su saglasne da u sredstvima javnog informisanja neće objavljivati podatke o zlostavljanim osobama, a posebno maloljetnim, dok ne ispitaju i ne utvrde sve relevantne činjenice i okolnosti vezane za svaki konkretni slučaj.

### **Član 7.**

(1) Na ime troškova smještaja zlostavljanih žena i djece u "Skloništu za žene i djecu", Fondacija lokalne demokratije će redovno mjesečno, počev od 01.09.2021. godine ispostavljati fakture radi naplate troškova smještaja od strane Kantonalnog centra.

(2) Troškovi smještaja u skloništu za žene i djecu utvrđuju se po osobi u visini od 44,00 KM / za dan.

### **Član 8.**

Kantonalni centar se obavezuje da će poštivati kriterije o smještaju, principe rada skloništa i redovno izvršavati finansijske obaveze prema Fondaciji lokalne demokratije.

### **Član 9.**

Kantonalni centar se obavezuje da će u saradnji sa zlostavljenom osobom u najkraćem roku (od deset dana), a samo izuzetno u roku od 30 dana, iznaći trajna rješenja za probleme zlostavljanih žena i djece.

### **Član 10.**

(1) Kantonalni centar će Fondaciji lokalne demokratije pružiti stručnu pomoć, mišljenje i savjet kod donošenja važnijih odluka koje se odnose na zlostavljane žene i djecu.

(2) Na zahtjev stručnog tima Fondacije lokalne demokratije, Kantonalni centar će postupiti kao u stavu 1. ovog člana.

(3) Kantonalni centar će kao nadležni organ poduzimati zakonom propisane radnje u cilju ostvarenja imovinskih i drugih prava žena i djece.

### **Član 11.**

Sve nesuglasice, ukoliko do njih dođe, će se rješavati u okviru važećih pravnih regulativa ili u duhu tolerancije i razumijevanja.

### **Član 12.**

(1) Ukoliko jedna od sporazumnih strana ne ispuni obaveze iz Sporazuma, druge dvije sporazumne strane imaju pravo da zahtjevaju ispunjenje obaveza ili da pokrenu postupak za raskid Sporazuma.

(2) Izjava o raskidu Sporazuma mora se dostaviti drugoj strani u pismenoj formi najmanje 30 dana prije raskida Sporazuma.

### **Član 13.**

U slučaju spora po ovom Sporazumu nadležan je sud u Sarajevu.

### **Član 14.**

Sporazumne strane su saglasne da stupanjem na snagu ovog sporazuma prestaje važiti Ugovor o smještaju socijalno ugroženih osoba žrtava nasilja u porodici u "Sklonište za zlostavljane žene i djecu" koji su sporazumne strane potpisale dana 21.06.2001. godine, kao i Aneks Ugovora o smještaju socijalno ugroženih osoba žrtava nasilja u porodici u "Sklonište za zlostavljane žene i djecu" koji su sporazumne strane potpisale dana 30.12.2003. godine.